



Kamis, 07 Maret 2024
Ogen: Nahum 3:8-17



Ulih Kejahatan Niniwe



Teptep kalak i doni enda nggeluh dengen banci itandai kalak erkiteken biak, ciri khas ntah pe keunikenna. Biak ntah tanda-tanda si mehulilah si pebelin i bas dirinta alu bage banci iinget ras iergai kita rikutken kerina si mehuli i bas dirinta. Bagenda me Nahum nuriken kecibal kota Niniwe ibandingken kota-kota si mbelin si lit i sekelewetna. Ibandingkenna ras Tebes i Mesir lit lau Nil si ngkelewetisa seh e me jadi pertahananenna. Sudan ras Mesir iperentahna dengen Libia si mbelin pe temanna. Amin bage gia galang ras hebatna Tebes pe iangkut nge ku pembuangan.

Ise kin Niniwe ibandingken kota si isingetken Nahum enda ndai? Labo lit si man agahenkenna e maka ia pe ngenanami ulih kejahatenna me. Lanai lit dalam puluh i bas ukumen nari, italuken imbang-imbangna me ia. Benteng dengen tenterana lanai bo ngasup njagai ia. Lit pe usaha guna mbentengei kotana labo ergegeh, radas me bangsa e desken labang. Bagenda me isehken Nahum kata nandangi Niniwe, kai si nandangi jadi man bana i bas erbage kejahatan si ilakokenna sedekah enda.

La kepe lit ulih si mehuli i bas perbahanen si jahat. Labo kepe banci kejahatan tetap menang, lit paksana ia talu, terbatas gegeh ras kengasupenna. E maka perlu kal robah, jera, meteh maka labo lit si la uli ngena ate Dibata. Dibata si erkuasa nandangi kegeluhen ras kebujuren. Perlu kal erlajar i bas kalak sideban nari, subuk negara, kalak si mbisa gelah jadi bahan perbandingan guna nggeluh reh ulina.

Persinget nandangi Niniwe ntah pe sekalak jelma, jadi kesempatan erlajar man banta. Arah si jadi nandangi kalak sideban, dalanta mpekenaken kegeluhenta reh ulina. Kerina lit ulihna, apai ateta sialoken, tergantung kai silakoken kita.